

TE HEEHURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa,
Te hoo e piti farane i te matahiti hoê.

Nu. 6.

Tiunu 1931.

Mat. 25.

Ua Faatupu Birikama Ioune i to Iosepha Semita Tohuraa

O teie ia te pae o te hoê mau haapiiraa i faaineinehia e te
Epitetopo Rahi no te mau Diakono; Ua faaauhia ei reô Tahiti e Etua.

I muri aé i te mau hamani-ino-raa e rave rahi i faaoro-
maiha e te Feia Moá i Missouri, ua faaue te tavana ra o
Boga (Boggs) i te mau Moromona, e haere i rapae au i taua
tufaa fenua ra, aore râ e haapohehia ratou. I teie tau aho-
aho ua tapeahia te Peropheta e te tahi atoa mau aratai o te
Ekalesia i roto i te tapearaa i Libereta. Ua rave Birikama
i te faatereraa na roto i te aratairaa, i te Feia Moá na roto
atu i Missouri e tae atu ai i Ilinoi e i Iowa.

I te mau mahana na mua aé i te reira, i te 8 no Tiurai
1838, ua farii te Peropheta o Iosepha Semita i te hoê he-
heuraa, (B. F. II8.) i te faaueraa i te tino ahuru ma piti
Aposetolo ia haere i tera pae au i te moana e poro haere i
te Evanelia. Ua faarue ratou i te Feia Moá i Fa Wese,
Missouri, i te 26 no Eperela 1839. Na muri aé i taua mahana
ra, ua haaputuputu Birikama Ioune i te tino ahuru ma piti

e te mau melo no te Ekalesia i Tuinito, i Ilinoi. Ua taióhia ia ratou te hoé rata na te hoé pae o te Feia Moá i Fa Wese, o tei roohia i te ati, mai te anihaaia haapono ia ratou i te moni e te puaahorofenua ia faautahia i Tuinici i na utuafare e pae ahuru. Noa'tu te yeveraa o te Ekalesia i Tuinici ua haapaohia teie aniraa, ua parau te hoé pae, e hoohia to ratou mau tiaa e te ratou mau pereue e to ratou mau taupoo ia roaa taua moni ra. I roto i teie amuiraa ua amuhia te oroa. I te faaotiraa o te putuputuraa ua horoahia e pae ahuru tara, e mea huru rahi te puaahorofenua i horoahia ia haere i Fa Wese. Tei rotopu i te mau taata tei horoa'tu i ta ratou mau puaahorofenua, o Amanada Semita, te vahine ivi na Warena Semita tei taparahihia i roto i te haamaniiraa toto i Hauna Mila, ua horoahia ta'na na puaahorofenua hopea no teie haereraa.

I nia iho i taua heheuraa ra, ua manaó te hoé pae o te mau taeae, no to ratou haapurararaahia, eita te Fatu e tiaua i te tino ahuru ma piti ia haere poro haere i te Evanelia i taua taime ra. Ua huru ê rá te manaó o Birikama Ioune e te tahi atoa mau taeae, no reira, ua opuahia ia haapao atu i te heheuraa, e ua faarue ratou, Birikama Ioune e te hoé pae o te tino ahuru ma piti, i Tuinici ia haere atu i Fa Wese.

I to ratou haereraa, ua farerei ratou i te Feia Moá e rave rahi tei horo atu mai Missouri e tae atu i Ilinoi ia ore ratou ia taparahihia. Ua farerei ratou ia Ioane Page e to'na utuafare, ua tahirihia to ratou pereoo e ua haapurarahia ta ratou taihaa. Ua ani Birikama ia'na e haere atoa anei oia i Fa Wese. Ua pahono mai oia e, aita e tia ia'na ia vai'ho i to'na utuafare i te pae purumu ra. Ua paraparau raua o Birikama, e i te hopea ua na ô mai Ioane, e haere oia. Ua horoahia e pae minuti ia'na ia faaineine. Ua hurihia te taihaa i nia iho i te pereoo, e na faahoro oia i to'na pereoo e tae atu i te vahi papu e ua vai'ho oia i to'na utuafare,

haere atura.

I te taeraa i Fa Wese, ua faaroo aéra te mau taeae, i te taeraa o te enemi i te reira vahi i te 16 no Eperera, e ua parau te enemi e, eita te hoé heheuraa na Iosepha Semita e faatupuhia, e ua parau atu ratou i te Feia Moá e, ia itehia ratou i Fa Wese i te mahana i muri mai e faantuhia ratou.

I te poipoi i te 16 no Eperera, ua haapao e pae melo no te tino ahuru ma piti, i raro aé i te faatereraa o Birikama, i te hoé amuiraa, ua faatoroahia e piti melo apí no te tino ahuru ma piti, e ua haamauhia te ofai tibi no te hiero i Fa Wese, e i te faaotiraa o te amuiraa ua haere atura ratou ia poro haere i te Evanelia.

I to ratou faarueraa i te fare no te amuiraa, ua na ô mai Theodore Ture, (Theodore F Turle) "A tapea e hoé minuti ia parau atu vau ia Iasaaka Rusera, ia-ora-na, ua patoto oia i te opani.

Ua parau ia Rusera vahine, a haere mai: O to tatou taeae o Ture teie."

Ua parau atura Rusera, e ere ia, ua faarue oia i teie vahi e piti hepetoma aénei. Ua maere oia, i to'no iteraa o Ture iho â ia, ua parau atura oia ia'na, parahi i raro.

Ua pahono atura Ture, "Aita e nehenehe, ua moé to'u mau hoa."

"O vai to oe mau hoa?"

Ua pahono atura Ture, "o te tino ahuru ma piti ia."

"Te tino ahuru ma piti?"

Ua parau atura Ture, "E, aore anei oe i ite, te 26 no Eperela teie, te mahana i faataahia ia haere te tino ahuru ma piti ia poro haere i te Evanelia i te mau motu o te moana? Ua faatupuhia te tohuraa, te haere nei ratou e o vau atoa.

Ua parau atura Ture ia Rusera, ia-ora-na, e ua tia noa

oia aore oia i parau. E mea na reira te faatupuraahia o te heheuraa, ta te mau enemi o te Ekalesia i parau e, noa'tu e, e faatupuhia te mau heheuraa'toa na Iosepha Semita, eita roa teie e faatupuhia, no te mea ua faataahia te avae e te mahana no te revaraa.

Ua fafau Birikama Ioune e to'na mau taeae i te hoé faufaa, oia hoi, ia faatupu ratou i te haereraa o te taatoaraa o te Feia Moá veve i rapae au i Missouri e tae noa'tu i Ilinoi, ia faaorahia ratou i rapae au i te iima o to ratou mau enemi.

Aore roa ratou i faaea i roto i teie ohipa e tae noa'tu ra, i te horoaraahia mai e te Fatu te hinaaro mau o to ratou mau aau. Tei rotopu ia ratou, i teie haereraa hopea, te pûpû veve hopea no te haereraa i rapae au i Missouri.

(E Tuatihia teie nei parau.)

Te Mau Taata Matamua tei Parahi i te Fenua Amerika

I te matahiti 2247 hou Iesu, oia hoi, i te paturaa o te pare Babela, te ora ra i te fenua i patuhia'i Babela te hoé mau taata parau tia. E mai te mea e haamanaó tatou i te reira tau ua riri te Atua i to'na mau taata no te mea e, ua haamata ratou i te hoé pare mai te manaó e, aita e nehe-nehe i te Atua ia haapeapea faahou ia ratou no te mea ua manaó ratou e, e hamani i teie pare mai te teitei roa ia ore ratou ia paremo ia faatupu faahou te Atua i te tahi tirui, e mai te manaó atoa e, e tae ratou i te Basileia o te Atua.

I to te Atua iteraa i teie ohipa, ua riri roa oia ia ratou, no reira, ua faahuru ê oia i to ratou reó ia ore ratou ia faaoti i teie ohipa faufaa ore. Teie râ mau taata parau tia, oia hoi te ati Iareda, o Iareda e to'na teina to ratou aratai, aita ratou i hinaaro ia faahuru ê te Atua i to ratou reó, no reira ua pure atura te teina no Iareda i te Atua mai te aniraa atu ia'na e, "eiaha oe e faahuru ê i to matou reó." E no to'na faaroo rahi e to'na haehaa, ua tae mai te parau a te Fatu

ia'na mai te faaiteraa ia'na i te na ôraa e, a haere oe e ha-
aputuputu i ta oe mau nănă, o te oni e te ufa e te mau huru
atoa ra, e te mau huru huero atoa o te fenua ra, e to outou
mau utuafare atoa e to outou mau hoa atoa. E ia na reira
outou, e haere atu outou i rapae au i te fenua i patuhia'i
Babela. E te na ô maira te Fatu e, e aratai au ia outou i te
hoé fenua maitai roa, e hau aé i te mau fenua atoa o te ao nei.

E i muri iho i te reira, ua haaputuputu ratou i te mau
mea atoa mai te au i ta te Atua i faaite ia ratou. E ua re-
va atu ratou i te peho Nemeroda i te pae apatoeriau. I re-
ira ratou i hamani ai i te hoé mau pahi e vau i raro aé i te
faatereraa o te Atua.

I te faaotiraa i teie mau pahi e vau ra, te vai ra te hoé
mea fifi ia ratou, no te mea aita ta ratou e hoé mori no te
haamaramaramaraa i teie mau pahi. Ua hamanihia taua
mau pahi mai te au i ta te Atua i faaite ia ratou, e aita roa
e hoé hió maramarama i roto maori râ te hoé apoo nainai
roa no te roaaraa to ratou matai. No reira, ua pure atura
te teina o Iareda i te Atua ia horoa mai oia i te ravea e
haamaramaramahia'i taua mau pahi ra, ia ore ratou ia tere
i roto i pōiri. Ia maoro rii ta'na pureraa, ua fâ mai ra te
Atua ia'na, e ua fafa oia i to'na rima i nia iho i te hoé mau
ofai hoé ahuru e ma ono ta te teina o Iareda i hamani. E
i reira teie na ofai i riro ai ei mea maramarama anaana roa.
Ua tuu ihora oia e piti o taua na ofai hoé ahuru ma ono i
roto i te pahi hoé e na reira atoa oia i roto i na pahi e vau.
E te vai ra te hoé ofai i te pae i mua e te tahi i te pae i
muri o taua mau pahi e vau ra. Ua tomo ihora ratou i roto
i taua mau pahi ra e te mau puaa e te mau huero e te mau
manu e te mau huru maa atoa hoj. Ei reira ratou i
tapiri mai ai te uputa, tuu maira te Atua i te matai puai roa
i muri mai i to ratou mau pahi, e e toru hanere e maha ahuru
ma maha mahana'toa i te painuraa i nia i te moana ma

mua i to ratou taeraa i te fenua Amerika. Ua tapae atura ratou i te toóá ó te râ i Amerika apatoerau.

I reira ratou i haamata ai i te faaapuraa i te fenua, e ua manuia hoi ratou i te ohipa. Ia maoro rii râ, ua moé te Atua ia ratou e rave ihora ratou i te mau peu iino roa. Te tumu i na reira'i, no te mea, ua manuia rahi roa ratou i nia iho i te fenua e ua tupu aéra te teoteo i rotopu ia ratou. E ua moé te mau parau a te Atua ta'na i faaite mai ia ratou i te na ôraa e, ia ore ratou e faatura i to'na ióa e rave hoi i ta'na ohipa, eita e nehenehe ia ratou ia faaea i nia iho i teie fenua maitai ta te Atua i horoa mai ia ratou.

No to ratou faaroo ore i te mau peropheta ta te Atua i tonono mai i rotopu ia ratou, ua tupu te hoé tamaí rahi roa e te hopea, ua haamouhia ratou atoa maori râ te hoé taata, o Korianitumera to'na ióa. Ua huna oia i to ratou mau parau tuatapapa i nia iho i te aivi Ramaha e pohe atura oia. I te matahiti 123 hou Iesu ua itehia teie nei api auro e piti ahuru e maha e te hoé mau taata ati Nephi. (A hió i te Buka Moromona i Mosia 8:7,8). Area râ na mua i to Korianitumera poheraa, farerei atura oia i te ati Mulekara e faaea ihora oia i rotopu ia ratou e iva marama e i reira pohe atura oia. (Moroni 21:22 taió i te buka aEtera taatoa.)

Papaihia e Teina

E Rata na to Te Paeau Moana Nei

Roto Miti, Utaha,
i te 1 no Me, 1931.

Te Feia Moá Taatoa i te Paeau Moana,
Papeete, Tahiti,

Ia ora na outou i te here mau o te Fatu e i te hamani maitai a to tatou Metua i te ao ra.

I te avae Eperera i mairi aénei i haapao-faahou-hia'i to matou amuiraa Orometua ho'i no Tahiti mai, e ua parauhia o Ole ia papai i te hoé rata ia outou, ei faaiteraa i te haamanaóraa e te aroha te vai noa nei â i ó matou paatoa nei, i ó te mau orometua ho'i mai e to matou mau fetii e tae noa'tu i to matou mau hoa.

Tupu aéra hoi to matou oaoa a faaroohia'i te aóraa parau a te tahi orometua e te tahi orometua, e te mau hime-ne hoi i matauhia e tatou. Tupu atoa'era te hinaaro e ho'i faahou atu i Tahiti na, e farerei faahou e paraparau faahou i te mau taeae e te mau tuahine e tae noa'tu i te mau hoa i roaa mai ia matou i to matou haerea i rotopu ia cutcu na.

Ua tae mai i taua amuiraa ra te mau orometua e rave rahi no te tahi tau e te tahi tau, i te haamanaóraa ei te faaiteraa mai i te mau mea i tupu ia ratou e te mau ohipa ta ratou i rave. Ua taióhia e ono ahuru taata i faamuhia i te mau maa monamona i taua pô ra.

E taime oaoa iho â; e taime haamanaó ia outou na; e taime hoi e hiópoahia'i te hopea e te faufaa o te Evanelia a te Mesia i rotopu ia tatou paatoa. E inaha hoi, tupu noa maira te manaó e, aita'tu e mea faufaa, maoti râ taua Evanelia mau nei. Oia iho â, ia imi tatou i te mau mea e au i te pae tino e tiaí; area râ, mai te peu ra e faaea tatou i reira, eita ia te oaoa mau e roaa ia tatou. Na roto râ i te rave i te ohipa maitai, mai tei roto i te Evanelia ta tatou i matau nei, e maramarama'i, e maitai ai, e oaoa'i hoi tatou; e inaha hoi, e haamaitai-atoa-hia vetahi ê ra mau taata.

Faaitoito â tatou, imi noa i te maitai no tatou e no to tatou mau hoa. E ere iho â ia te oaoa mau, mai te peu ra o tatou anaé tei maitai e o te faaorahia: area, ia haamaitai-atoa-hia e ia faaora-atoa-hia to tatou mau fetii e to tatou mau hoa e tia'i. Ia vai â na outou paatoa i roto i te here e te haamaitairaa hau ê a te Atua, o to matou ia hinaaro e te

pure mau.

Tera mai te mau ióa e haamanaóhia e outou:

Mama Poropiti	Tiunu Poropiti
Moroni Poutera	Eleta Christensen
Mati Manatuma	Samuela Dimond
Ioane Orotona	Melvin Strong
Viriamu Poto	Alama e Ruita
Matara e ta'na vahine	Eduana P. Farosa
Leone	Leroi
Hepera Tefera	Eraneta
Elvan Korth	Tamati e ta'na vahine
Aneterea Steadman	

Ole e te utuafare-

Tiulia	Aneta	Vero
Bertrand	Elaine	Loa
Joan		

NA TE KATORIKA

I roto i te vea Katorika i te avae Me-Tiunu, ua faahapa mai ratou i te Ekalesia nei no te hoé parau i papaihia i roto i te Heheuraa Api. Oia hoi, ua rave Iosepha Semita i te vahine rau.

Ua na ô mai ratou, "A feruri outou e te mau taata Tuamotu e a hió: E au anei teie mau peu i te hoé Ve a te Fatu?" Ua parau atoa mai ratou, a taió i te parau ta Iesu i parau, Hoé tane, hoé vahine, mai te mea e, e piti, e moiheuo ia. (Mat. XIX, 6) (Ua hape atoa ta ratou faahororaa)

E mea tano roa teie nei parau i nia i to ratou iho mau orometua. Eaha te tumu aita ratou i rave i te vahine hoé, mai ta Iesu i parau. Te faahapa nei ratou ia ratou iho i taua vahi ra.

No reira e tia roa ia ratou ia hiopoa maite ia ratou iho na mua e faaafaro i to ratou iho mau orometua hou ratou i faahapa mai ai.

E te parau atoa nei matou, a feruri outou, e mau taata Tuamotu e a hió: E au anei teie mau peu i te Ekalesia a te Atua.

—*Papaihia e Gihoti Poropiti*

TE TUPU NOA NEI TE PARAU TOHU

I te matahiti 588 hou te fanauraa o Iesu Mesia, ua haere te arii no Babulonia e ta'na nuu atoa i roto i te fenua Ierusalema. Ua tamaí ratou i te ati Iuda, e i muri aé i haamouhia'i te oire Ierusalema. Ua taparahihia te tabi mau taata i te oé, e ua hopoihia te pae rahi i roto i te títîraa i te fenua Asia. I reira ratou i haapurarahia'i i roto i te mau oire. Ua faaea ratou i reira e hitu ahuru matahiti e i muri iho ua hoí te tahi pae o te ati Iuda i to ratou iho fenua i Ierusalema.

E na matahiti i muri aé ua haere te arii no Roma e to'na nuu i rotopu ia ratou e ua taparahihia te mau taata e rave rahi, e ua hoohia ratou i roto i te títîraa i te mau fenua atoa. Ua haamou-faahou-hia te oire Ierusalema, aore e hoé taata e aore e hoé fare i toe mai i roto i taua oire ra. Ua arotehia te vahi tiaraa no te Hiero Moá. No reira ua tupu te tohuraa no Ieremia i te parau mai e, "Ua opanihia te mau oire i te pae i apatoa ra, e aore a taata ia iriti; e hopoi-ê-hia Iuda ei títî; e hope paatoa i te hopoi-títî-hia.

Eaha te tumu ratou i hopoihia'i i roto i te títîraa? No te mea aita ratou i farii i te mau parau no te mau Peroppheta o tei tae i rotopu ia ratou ra. Ahiri ratou i haapao i te mau parau na taua mau Perepheta ra, aita ihora ia ratou i farii i taua utua ra.

Mai te au i tei papaihia i roto i te Ieremia e haaputupu-faahou-hia ratou i to ratou iho fenua. "Inaha hoi, te fatata maira te tau, te na ô maira Iehova, e ruri ê ai au i te títîraa o to'u ra taata, ia Iseraela e ia Iuda, te parau maira Iehova; e aratai faahou mai au ia ratou i te fenua i horoahia e au i to ratou mau metua ra, e na ratou e parahi." Te tupu noa nei teie tohuraa i teie mau mahana nei, oia hoi, te hoí nei te ati Iuda i te fenua Ierusalema.

Papaihia e Manuela

Te Mau Parau Apî

E MACHINE API TAVIRI HOHOA

Na te hoé taata Farani i hamani te hoé machine apî taviri hohoá. E mea ê roa teie huru machine no te mea e nehenehe i teie machini ia neneí i te hohoá o te hoé ofai i pupuhihia i te reva ra. Noa'tu i te oíóíraa o te tahi mau mea tere roa e neneí iho â taua machine ra i to ratou hohoá. E riro te reira e mauhaa i roto i te rima o te mau taata paari ia tauturu ia ratou i ta ratou ohipa ra.

TE PAHI RAHI ROA ANEI O TEIE NEI AO

I te tahi mau mahana i mairi aénei ua itehia te hoé pāpā ofai i tanuhia i roto i te mau mea tahito o te oire tahito ra o Nineve. Ua papaihia i nia iho ra te huru o te hamani-raa i te pahi o Noa e te tahi atu â mau parau i nia iho i te Dirui. Mai te au i te parau i papaihia i nia iho i taua pāpā ofai ra, ua rahi aé te mau faito o taua pahi o Noa ra i tei papaihia i roto i te bibilia. Mai te au i te parau i roto i te bibilia e 450 avae te roa e 45 avae te aano e e toru tahua hoi to Noa pahi ra. I nia iho râ i te reira pāpā ofai, ua faaitehia e hitu tahua to'na e ua fatata to'na roa i te 1000 avae, e to'na aano hoi, ua fatata ia i te 200 avae. Mai te mea ua tano teie mau parau, ua rahi aé to Noa pahi i te mau pahi auahi rarahi o te ao nei o teie nei tau. Te pahi auahi rahi roa o te hau Marite o "Leviathan" to'na iá e e 100 avae to'na aano e 907½ avae to'na roa e ua hau roa to Noa pahi i te reira.

TE MANUA MARITE, U. S. S. CHICAGO

Ua tae mai te hoé pahi manuâ Marite i Papeete nei, te "U. S. S. Chicago" to'na iá. E pahi apî e te nehene-

he ho
ete ne
o Tah
faatu
hi ra.

I
te An
mau
pupul
e te n
nia ih
te rev
i te m
hopu.
iho i t
Me e

EPI

E
avae
reira
toetoe
tere t
ra o "
Puruf
reva t
e reva
roa m

I
faeha
ago'.
ani ho

he hoi. E maha mahana te maoro o to'na faaeearaa i Papeete nei e i roto i te reira taime ua faatia te mau taata toroa o Tahiti nei i te hoé mau tamaaraa e te tahi mau oriraa ia faatura hoi i te mau raatira e te mau faehau hoi o taua pahira.

I te mahana Sapati i muri aé i te pure oroa ua haere to te Amaa Papeete i nia iho i te reira pahi ia mataitai i te mau mea i reira. Te vai ra te mau pupuhi naínaí e te mau pupuhi rarahi hoi e e vau initi te rahi o te ofai i pupuhia e te mau pupuhi rarahi. Te vai ra na pahi reva e maha i nia iho i taua pahi ra e te mau machine ia faatae ia ratou i te reva ra. Te vai atoa ra te mau pupuhi no te pupuhiraa i te mau ofai na roto i te miti ia haaparari i te mau pahi hopu. E mea rahi atua á te mau mauhaa no te tamaí i nia iho i te reira pahi. Ua faarue te pahi i Papeete i te 12 no Me e ua tere atu te pahi i Pago Pago.

EPITI HURU PAHI E TERE I TE APATOERAU RA

E tere e piti pahi i te pae i apatoerau roa i teie mau avae i mua nei. Te hoé pahi, e pahi hopu ia, e e tere te reira i roto i te miti i raro aé i te pape paari i te mau vahi toetoe i te apatoerau ra. E te tahi pahi e pahi reva ia e e tere te reira na roto i te reva ra. Te jóa o taua pahi reva ra o "Graf Zeppelin" ia, e e pahi reva rahi roa no te fenua Purutia. E haere e 45 taata i roto i taua pahi reva ra. E reva te pahi hopu na mua e ia fatata ia i te apatoerau roa e reva ia te pahi reva e e farerei raua i te pae i apatoerau roa mai te mea e tere te mau mea mai tei opuahia e ratou ra.

E MELO API HOI

I te mahana Sapati i te 10 no Me ua baptizohia te hoé faehau no nia mai i te pahi manuâ Marite, 'U. S. S. Chicago'. Ua haere mai oia i te fare orometua i Papeete e ua ani hoi oia ia matou ia baptizo ia'na. E faaite maira

oia i te tumu no to'na hinaaro. Na ô maira taua taata apî ra, ua farerei hoi oia i te hoé taata Momoni i te fenua Tininito a tere ai to ratou pahi i reira. Na teie taata Momoni i faaite ia'na i te huru o te haapaoraa Momoni e i muri mai hoí atura oia i Amerika e ua horoahia te hoé buka a Moromona ia'na ra, e taió i hora oia i te reira. I to'na taióraa i te reira buka ua tupu hoi to'na hinaaro ia imi i te huru mau o te Ekalesia Momoni e no reira ua haere pinepine oia i te mau pureraa e i te mau haapiíraa na te Ekalesia i roto i te fenua Tarafonia e i te hopea ua roaa ia'na te ite pâpû e ua opua hoi oia ia baptizohia ei Momoni. Na mua aé râ i te faaotiraa o taua oroa baptizoraa ra ua reva mai to ratou pahi e ño reira aita i oti taua ohipa ra ei to'na taeraa mai i Papeete nei ua imi hoi oia i te Ekalesia Momoni e ua anî hoi oia ia matou ia faaoti maitai i te reira ohipa e ua na reira hoi matou. O Wiley H. Smith to'na ióa.

E HAU API TO TE FENUA PANIORA

I rotó i te avae Eperera i mairi aénei ua orurehau te mau taata i roto i te fenua i Paniora e ua faahuru ê roa ratou i to ratou hau. Ua tiahi ê atu ratou i to ratou arii o Alfonso e to'na utuafare atoa, i rapae au i taua fenua ra e faatia i hora ratou i te hau republica e ua haru ratou i ta te arii man faufaa ra. Ua faatia hoi te hau Marite e te hau Baratane i taua hau Paniora apî ra. Teie ia te vau o te mau hau tei faaore i to ratou arii i te mau matahiti 21 i mairi atura ra.

E OIRE POIRI ROA HOI

Ua itehia i te fenua i Mezico te hoé oire i roto i te mau mouá i te atea ra, e ua matapô hoi te mau taata i roto i te reira oire. E 900 te rahi o taua mau taata. Te hoé mai ia te tumu no te reira huru taata ra. Na ô maira te taata tei ite i te reira, aita roa ratou i haere i rapae i to ratou mau fare e tae noa'tu i pou aî te mahana e aita te mau taata i rapae i ite i te vairaa o te reira oire.

M. Bonnet M. Gérant et Imprimeur,
Angle des rues Bréa et Dumont d'Urville, Orovini, Papeete.

Epiteto

I m
ve ra
raa e
te rei
poro
hia o
Setep
anava
i tera
iho i
ra, e u
i ta'na
pohe